

四庫全書

集部

欽定四庫全書

強齋集卷六

明 殷奎 撰

頌

曹別駕修園頌

闕

離離婁曲其勢惟下羣流來緒百里灌莽障之隄防圍
為疆畝載墾載耕匪今自古賦入大農事在有司繇其
善崩歲一築之正月載陽實惟其時先事庀徒罔有愆

期今年何年事異曩昔鑿河白茆悉力赴役自秋徂春
功罔時畢殍我子弟罄我家室春云暮矣圍不時築侯
曰嘻哉予其奔走屏我騶御予載糧糗履畝徂畛勞來
安集流離者復殿屎者夷扶老提幼十百其來畚鍤既
興笑棟既蓄我侯勗之作者不疲往時為役官則剗之
今自擇利侯不擾之往時先期事或迨之今僅兩月功
覆倍之民曰我侯顧我復我夙駕在原問我鰥寡遂我
生人纒寒粒餓水壑既歸土宅斯妥我稷疑疑我苗芄

芄覃耜錢鑄俶載攸同無苦下濕有坊有庸其誰使然
緊侯之功緊侯之功緊年之有以為嘉穀以為春酒以
登公堂以獻以報介以景福使侯壽考我蜡我享將侯來
巡吹笙擊鼓同我豐年侯則勤矣侯今且還有杲出日
屏星爛然稚耄蚩蚩空巷傾社奔走後先遠送于野載
道歌謠可風可雅矢詩颺之以告來者

贊

黃文肅公像贊

噫子黃子道純粹精持之以敬居之以貞從政決獄守
邊講武儒效卓然莫予敢侮其在考亭獨為忠臣同異
曲直以訂厥真不偏不黨千載斯仰讀公之書拜公之
像

周山人畫像贊

周君仲高父抱天文地理之學遊四方廣川大山觀陰
陽之會徵休咎之符蓋其所得深矣異時方承平自錢
唐來婁曰天下兵且起吾卜地莫婁善已而錢唐燬婁

果無恙人盡避之人有求者盡之周氏於是三十有五
年矣朝家建新制郡邑興作唯謹崑山自縣衙而次官
寺神宇凡若干所相方定位揆日撰辰悉出仲高於是
縣大夫與其僚吏為畫君像以贈而屬長平殷奎贊之
其詞曰陰陽之家肇自古初黃帝太乙金匱堪輿叢辰
日苑亦盡有書迺相岐陽迺卜洛都允臧楚宮考經匪
誣齊有周伯南公之徒維仲高父繫其裔餘地脉山骨
風含氣儲奧蹟宣豁幽玄闡敷朝降新制壯哉縣婁門

觀堂寢面勢翼如爰既館傳使節所於亦有祠宇神人
嘉虞載景載觀既勤既劬功則多矣其報猶虛迺為繪
事貌象子圖庶幾永久示學之模角巾羽衣消搖里閭
遊神太玄與造化俱

冠贊

梁仲份氏攻韜髮冠居材必良鬚縫摩剔悉中矩度蓋
其弓冶箕裘有素矣為之贊曰維古冠首以旌成人以
謹為禮以辨尊卑三王迭作其度彌文毋追尋弁纚絕

纓延璠旒璫藻等殺斯陳是曰元服貴莫與倫工攻其
技居百藝先妻有梁仲實名茲事載擇之術載守之世
凡今為工孰與仲氏其守為仁其擇為智其物則禮其
辨惟義信不失度巧靡淫異彼工則細為道已備誰
藝成視此詩忌

孫仲方小像贊

其材通材其仕滂仕從周禮製今人之衣冠雅吳語仍
古人之風致甫及知非之年已操遯世之志吁此其所

闕

以為孫仲方也耶

朱伯盛小像贊

矍然如昨秋風野鶴老矣于今孤雲遠岑軌有道之躅
不娶終身何行之卓求古人之心不刻黨碑何執之深
吁此其所以傲兀乎變幻吁此其所以膏盲乎山林

先君畫像贊

孝友達之三族沖和在此一枝聆語言而永佩瞻遺像
以長思

銘

硯銘

有瑟斯石色紺碧兮含章守玄靜以澤兮弟子貽我佐
纂述兮文字光晶發幽蹟兮勿為淫邪汚彼白兮殷世
寶用永無射兮

存誠齋銘

心惟虛理惟實操其要守厥一耳目慾手足佚羣邪攻
衆妄誅隙弗室間焉出役於形淪於物緊齋居懼戰栗

賓見門神覲室動以禮念罔逸外既制中以育思無邪
你無斃誠斯存銘用述

密齋銘為弟孝揚作

孝揚讀書之齋題其戶冊曰密密之為訓有靜者邇者
審者慎者有山如堂者孝揚不山居宜於夫靜夫邇夫
審夫慎之四物者有合焉矣夫齋者居此而齋吾思慮
也靜也邇也吾言地也審也慎也吾言德也夫以靜而
甚邇之地而脩吾且審且慎之德德之成也奚禦焉為

之銘曰相古哲人威儀抑抑廉隅棘然于以占德亦有
節士不出語言戶庭閒若顧行于先之二人者爰審爰
慎在詩易辭為戒諄諄君子于學莫信匪經靜當動禁
遠主邇鳴無迷無僭無闕無侮刺皮以鼠罰童以殺勿
詖勿悻勿躁勿諛此口于瓶彼耳于垣齋居有嚴是攝
是訥充德成行表裏交盡載慮載思日夕在茲名爾毋
夸尚實踐之

箴

時敏樓箴

都生恒讀書之樓名曰時敏既謁其鄉先生記之序之
銘之益求文辭以侈之予懼其名已侈而實不繼也作
樓箴以貽之其詞曰夢夢蚩蚩孰知孰覺相古先民載
詔之學載筆之書自命說有作前聞古訓後事之師予
遜厥志予敏以時於皇聖學曷以尚茲繫都氏予惟學
之嗜聿求有功敏以自勵功不在近成不在速毋躐階
以登尚自牖而入朝斯夕斯罔怠以盈罔靡已之為而

徇人以名川以珠媚彪繇中弼闇然其章幽然其光棲
居司警爰告高明

傳

牧牛夫小傳

牧牛夫不知始何為者年可五十餘貌充然澤皙類有
道人常騎牛往來三衢山澤間從以羣犢短蓑圓笠扣
角行歌倦即偃卧背上任其東西遇水草美處便徜徉
終日往往為漁樵相推罵油油焉熙熙焉曾不知世有

軒冕祿位可貴也人皆目之為牧牛夫夫亦因自號牧牛夫或曰牧牛夫姓陳氏其居萬川里在西安縣永章其字也或曰牧牛夫蓋白牛居士之世夫離子曰甯戚商歌迺任齊國五穀大夫乞食牛口之下終霸其君彼皆適有遭也古今抱道含德老死湮沒無聞知者豈其少哉然亦多託焉以逃或不屑於用世若牧牛夫非其果於長往甘溷鳥獸亦繇世主弗知未有以相遇也

文

崑山縣鼓角樓上梁文

伏以蘊玉山前沃壤壯萬家之邑鳴琴堂外重門高百尺之樓是曰麗譙式縣象魏睠茲婁治置自漢家表東海之一區冠中吳之六縣因近代變遷其井邑舊觀未還當聖朝宏遠其規模缺曲咸備政無不舉禮有必隆惟治官啓閉之司係民庶觀瞻之體伐鼓鳴角於以警乎昏昕下漏定高是用節夫晝夜乃因農隙爰督工程宗墉岷興複宇相瞰壯無嫌於上僭麗不至於過奢尊

施一邦制存兩觀對張鷟吻消患全資守令賢聿舉虹梁
成功快覩兒郎偉歡謠博采善頌俱陳拋梁東五更海
日出曈曈天上九重知帝德眼中百里見民風拋梁西
太湖浩蕩楚天低規模壯麗觀瞻聳更鼓分明政令齊
拋梁南吳淞環抱勢分三江湖身遠丹心耿耕織圖開
美化覃拋梁北拄笏朝來好山色三登農卜太平年百
歲民躋仁壽域拋梁上天威咫尺咸瞻仰太守來巡炳
月輪郎官出宰符星象拋梁下簫鼓臘祠喧里社豚蹄

盃酒祝豐穰嘉麥靈苗徧田野伏願上梁之後乾清坤
寧四海太平之無象風調雨順五穀皆熟而有年人趨
禮義之門物荷生成之澤外戶從茲而不閉園扉自此
以長空鼓篋衿青咸被弦歌之化扶藜戴白永為擊壤
之民

蘇州府養濟院上梁文

兒郎偉我皇朝三靈眷命奄萬年中夏以為家一視同
仁先四者窮民而發政澤霈甘露恩翔祥風蓋米廩崇

年善養既行於庶老而辟雍講禮推恩遂及於幼孤不
值昌期曷修隆典迺睠中吳之會府實稱內甸之雄藩
稔稻流脂物產競誇其富庶林葩應運土風未改於清
嘉惟三讓至德之流光逮十老元豐之勝會彌文益著
華望加隆念茲疲瘵殘疾之餘多出顧陸朱張之胄顛
連無告惻隱斯興肆朝制之載頒普皇恩之廣被歲布
月粟貽垂令甲之文風愐雨幪爰降繪圖之事匠石爭
先而獻技子民恐後以輸勞功不日成材如雲集大為

宋小為桷聿看輪奐之新老者安少者懷總荷生成之
造式涓吉且肇舉修梁裒此歡謠溢為善頌拋梁東皇
恩洋溢海波同仁化漸民功及物先加殘疾與疲癯拋
梁西日近長安路不迷從今受鬻應無缺為見今年米
價低拋梁南春日垂虹五馬驂明年賜帛迎丹詔擬獻
吳儂八繭蠶拋梁北沙幕兵戈已休息老人擊壤向康
衢鑿井耕田皆帝力拋梁上太平此日承天象熙熙皞
皞樂春和草木羣生同長養拋梁下物息時和通八蜡黃

童白叟保天年四海一齊歸德化伏願上梁之後星緯
協軌華夷歸仁居安宅於樂土開壽域於熙辰三老五
更流東都孝弟之美化八族四姓建中吳文武之奇勳
外戶夜開而不閉太倉紅腐以相因千萬間寒士歡顏
共處如山之大厦五百歲聖人在位願登斯世以長春
各安環堵室同作太平人

勸農文

乙巳歲

蓋聞民生之本在於食足食之本在於農本州水滂之

餘役繁賦重民力凋耗不可勝言有司非不欲時使薄
斂節用愛人柰何當此用武之秋國計軍需所費浩瀚
雖欲稍加寬卹而不可得所以農民日困無復安業樂
生之心顛沛流離深可憐閔雖有司一面多方措置不
忍坐視其斃然爾農民亦須安心著業勤力營生及時
及節趁早耕種修築岸塍整理農具切不可自暴自棄
拋荒田產傷殘軀命後雖悔之已無及矣且耕種之理
本合得食而偶逢水旱之災則饑在其中然不可因饑

而廢耕也因饑而廢耕是因咽而廢食也去年饑安知今年之不熟乎古人云是穠是褻雖有饑饉必有豐年此之謂矣汝民今各勉力有司方申朝省早晚當有賑卹之意如穀種口糧之類必將次第俵散不使爾民重失所也爾民其勉聽之毋忽

疏

受道傳住華藏方外交疏

虎溪來往風流粲然三笑龍井文章翰墨卓彼一時夫

何二老之興能致諸賢之盛神交方外有如此者道在天下豈無人哉受公講師辯鋒懸河心鏡麗月好竒賞俊惟澄觀以詩鳴求實去名而浩初以易顯壓班銅龜塔下出世紫竹林中再命彌尊五宗丕振探滄海寶珠之穎喜彼不遺覽朝陽玉石之輝快茲來集如證雜花而頓覺富貴若出初日而先照崇高百川瀾洄衆山風動宴坐方丈室嗣說豫公法必有後斯光乎前重作疊浪軒細和劉郎詩安知今之不如古

崑山州重立劉龍洲先生祠堂疏

本州馬鞍山東齋故有劉龍洲先生塚墓祠堂廢壞已
久今欲重新興造以補山中故事願要同志共相其成
疏曰右伏以表青山謫仙墓自古有尚賢之人立白社
孺子亭豈今無好義之士念曠世相感者得此心之同
然故宋龍洲劉改之先生忠義絕倫文章間氣上書伏
闕期至寢門之朝持節和戎肯下穹廬之拜偉然才智
萬人之傑壯哉湖海一世之豪乏嗣承家天道無知於

伯道買山作塚情文迺見於友文豈期物換星移竟使
林慙澗媿夜臺何在丙舍都空茲欲從事陳跡之遺用
敢徵惠斯文之厚樹豐碑於故隧構祠宇於高岡華表鶴
歸城郭依然如故滄洲龍去風雨豈不快哉

孫副使贍行疏

泰郡孫侯因遊宦留處崑山曩嘗起赴京師以廢疾免
歸今茲又當例遣而橐中之裝空矣其何以堪周急之
義我諸君子必能成之疏曰新豐翁揀歸舊鄉土自是

福人霸陵尉呵止故將軍誰為識者孫侯仲毅斃社珠
采崑岡玉英結髮從軍兩臂偏枯身尚在逢場作戲十
年一覺夢都空夫何選壯於戎行未免掛名於仕籍儲
無甌石柰此才遺行有贖金沉緣兵餽君子固能周急
大夫士孰不好仁喋喋更言多多益辨

西安府宣聖廟學興修疏

豐鎬故都迺文武周公聲教本原之地宋金舊學實漢
隋唐氏京師首善之區槩以地方所係者尤重相其遺

宇而摧焉已多不有興修即成廢墜然土木之功不苟而布粟所出無從欲遂勇為必資好義且廿年黷武而靈光翠殿巋然獨存及四海同文而鴻都石經儼其林立于以信斯文之未喪於焉知吾事之可成咄哉檀施開彼仙佛之宮徒勞而無益春秋二三策用此人民之力雖費而奚譏言有大而非夸勢若緩而實急行當庀役便請題名謹疏

崑山縣善聚菴化齋糧疏

奉為本菴新建未具齋糧及所願善人長者共加樂施
擬於佛座之旁左薦亡靈右崇生祀飽贊諸福永報眾
恩者伏以檀越心崇三寶叢林下好種福田沙門口
契十方鉢孟裏要成活計有志必就無感不通即縣市
之前區依山城之南郭肇開精舍額善聚以為名擬設
長齋囊羞澀而難繼事緣草荆力費支持老比丘要作
粥飯頭諸長者須看袈裟面帑有錢庫有粟千鈞之判
休停左事死右事生一飯之恩必報大書隨喜小疏化

綴謹疏

題跋

書信義鄉君墓銘後

右唐信義鄉君馬氏墓銘墓在虎丘西山至正己亥為
城築所發吳縣博士盧熊得其誌石摹本見遺其文首
行題曰故高府君詔授崑山縣信義鄉君夫人馬氏墓
志高府君當是其夫而序文並不及之但云有子玄楷
上柱國而馬氏受封之由亦不載也其叙馬氏三世曰

王父某大父某父某是以王父稱曾祖而不知其為大
父之通號也至曰高彼淑媛之辭則又因其夫姓而假
託附會之也余竊意其俚巷庸人所為然詞語頗亦雅
馴則又疑初學之士剽竊補綴而成者獨其母子勲封
如此疑當時輸粟或戰功所致馬氏卒塋在開元十二
年乃有唐極盛之時玄宗方勵精圖治宜不濫於爵賞
豈中睿之世韋庶人上官婕妤安樂太平主輩斜封墨
勅之所授歟予方與二三友朋更定州志補其缺遺斯

石所載年紀爵里尚為可徵也哉文雖非工宜不得而棄之也況開元距今六百五十餘年石銘之出不毀於版聿之傭不入於鄙俗之室考其封邑乃余與公武之州里公武藏之而余為記之如此夫豈偶然也哉因書以復公武且將審覈其論議云

公武跋附

右馬夫人誌楷書并題共十六行行十七字余始得此石以搨本寄殷君孝章欲作跋語未暇

也孝章洽聞好古即為之著論書以見示余遂不敢復措辭余謂古人碑頌之作蓋不苟也蔡邕自言郭有道碑無媿色皇甫湜亦不肯改作碑銘以其傳信將來有所稱述故耳論者又謂葬銘冢刻叙事直書為得其體往往見唐人墓志皆以方石為之文辭甚畧不著書撰人名豈以碑碣非名人碩儒則不敢當故寧拙而不工寧簡而不繁制度相承如此後世之弊乃有大

書深刻曲筆諛聞盜名字以示夸耀假聲位以
取譏訕者則此文之作雖甚簡畧書法未善以
今觀之與諛墓之文相去遠矣孝章之評非篤
於古學者不能及然馬氏年八十餘其子玄楷
位至柱國固已蒙被顯榮計府君亡歿時先有
志文於此遂不詳著及考之唐紀開元廿七年
天寶七載大赦婦人八十以上俱授鄉君皆在
此碑之後則馬氏亦覃恩所及但未審在何年

耳近虎丘築壘發唐人數墓皆開元元和開成
時所塋馬氏以吾鄉婦人勲封昉見于此特為
存錄亡友楊彥才作崑山志因羅傳記未克成
書宜孝章於此文尤致意焉己亥歲十月朔盧
熊書

題華萼樓殘碑

華萼樓殘碑徐季海書也咸陽吳明府既與予訪得之
於興慶故址遂手自搨之僅七十許字雖焚裂不完而

筆力意度固無恙也千載之下想見古人之製作唯其
摧毀剝落之餘故其惜之尤深也烏乎開元天寶之際
所以鋪張太平之盛者其文章翰墨范金鑿石亦既多
矣今余二人乃獨戀戀於此者蓋玄宗之友愛誠近世
帝王之盛節而孝悌之感出於人心之同然其歆羨愛
慕自有所不能已也夫豈獨以季海之書而止哉明府
方南旋且將裝潢為卷軸謂予不當無所識遂書此以
歸之洪武五年九月十有六日書于京兆府學之西堂

啟札

代陶教授請蔡教授啟

鴻都六經喜星鳳之快覩柴桑三逕嘆松菊之猶存豈
期衰謝之餘幸獲交承之好雖由公選實副私悰恭惟
郡博有道先生海內偉人淮南右族文章宗匠詩禮名
家挺炯炯之丰標頎然玉立接霏霏之咳唾辯若懸河
百篇騁倚馬才千金學屠龍拔秋風騎鶴慣攜十萬貫
以遨遊夜月吹簫快詠廿四橋之詩句跂予仰止慰我

來思方黌舍之渙新適青瓊之復舊杏壇春暖播春誦
夏絃之聲芹泮雨晴嚴月書季考之法州人得以矜式
學者有所依歸嘉惠崑庠比隆湖學某者草茅無術萍
梗有年誤薦牘之一章叨講筵之三載廣文官冷才名
老去奚歸令尹事新舊政慙無可告少需覲面終獲論
心

又啟

有某啟茲審榮膺絳帳喜復青瓊師表得賢士林增重

在昔曾講授而傳業幸重來鼓舞而作人式展去思爰
歌來暮恭惟廣文敬齋先生溫溫玉質渾渾金聲家學
以西山之傳器局有北海之量斯文砥柱鬱為庠序之
光吾道網維夙仰楷模之正所學皆伊洛諸儒之學其
文即揚馬西漢之文當廟學巍然輪奐之時正師道奮
馬作興之日西來閭闔益猶就熟路而駕輕車直上扶搖
會看乘長風而破巨浪某等三生多幸再遇有期庶幾
化雨之霑行挹清風之論情之所嚮言莫敷宣

答朱氏聘啟

作弟答

右伏以治平執政之稱賢成雲孫於宅相白水聘君之
擇壻得朱子於門人敢偶華宗聊期先哲茲承令嗣上
舍學優經藝方伉儷之是求謂某大兄教諭房長姪女
某年及字笄遂婚姻之見問竟緣媒氏荐講親盟雖莫
望於下風實貪求於同氣儷皮先禮既煩使者之來三
月公宮當謹女師之教式遵嘉命俯俟良辰襲飛鳳之
吉占多乘龍之喜色惟提甕以承君子倘此女之如儀

則覆瓿之傳有人信吾兄之素志報儀不腆他楮仍陳

浦聘繆招贅啟

長沙內史受經學於申公中臺令君忝家聲於晉代匪
因媒妁曷接婚姻伏承英嗣貢元書貯腹中久慕據床
之選而某息女情鍾膝下方深設席之圖自言愛女甚
於男人羨此翁之得壻願徵秦贅果協蔡占冰玉相輝
坐媿蒹葭之倚樹門闌多喜行看花燭之聯屏薄禮斯

陳副緘以載

雜著

道統論

天理之在人心亘萬世而不可泯者前聖後聖其揆一耳甚矣此心之靈也莫大於天地而此心之體同其大莫妙於鬼神而此心之用同其妙上古聖神所以繼天而立極者夫豈果有一物以繼之立之者哉蓋此心即天地之心而神會默契與天合德先天而不違後天而奉時其聲律身度自有以為天下後世之準則若有以

繼之立之耳易之所載自三皇始而伏羲氏以前推而上之厥初生民必有繼天立極之聖神創制立法為後聖之矩度然後後聖得有所宗而聖聖相傳焉此道統之所由始也然其所傳之統亦豈有親授密付之事哉不過此心之理古今同貫先後相續若有端緒是以謂之統耳而統果何在哉是故堯舜禹之精一執中者此心也商湯周武之建中建極者此心也周公之思兼三王者此心也孔子之祖述憲章者此心也顏曾思孟心

周孔之心者也周程張朱心孔孟之心者也周公而上
聖人得其位統之在乎上者也孔子而下聖賢無其位
緒之在乎下者也然統有上下而心無古今揆之一者
又豈有二致者哉雖然周子之學所以繼孟子之絕學
於千五百年之下者予朱子於文字之間屢言之矣而
中庸之序明道之表乃直以程子上接孟氏而謂孟子
以來一人而已何哉蓋程子之學固出於周子而妙悟
默契自得於道者蓋有不盡出於周子也說者以周程

所傳有顏孟之分豈有是哉若夫子朱子以來則免齊黃氏北山何氏魯齋王氏仁山金氏白雲許氏其緒之引于南者也魯齋許氏導江張氏其緒之派于北者也道統之傳固不敢妄議而斯文不絕如線之一脈此理之具於吾心者尚當於此而求之

春秋經義

齊鄭石門

三 隱

宋公齊侯衛侯盟瓦屋

八 隱

會齊侯

宋公同盟于幽

六 莊十

同盟平丘

三 昭十

公會齊侯

莒子邾子杞伯盟于鄆陵

昭廿六

齊鄭于鹹

定七

春秋紀諸侯合散之漸而伯事之興替係矣甚矣諸侯之盟會有關於世道之升降也春秋之初未有特相盟者而石門之役齊鄭首為之未有參盟者而瓦屋之歆宋齊衛復為之而世道之漸趨於有伯者已不可遏矣於是幽之前盟齊桓遂為之主雖以魯人之疑而不害諸侯之同欲也伯事之興春秋所以志諸侯之合者其勢有所必至也桓公既往世伯在晉未有敢背之者及

乎平丘之盟而諸侯始貳雖欲示之以威而不能挽之使合也而世道之復趨於無伯者亦不可遏矣於是鄆陵而參盟復見于鹹而特盟復書而伯事於是乎替矣春秋所以志諸侯之散者夫豈一朝一夕之故哉昔者盟詛之事掌于王官諸侯有疑則請命于天子聽命于會同何敢私相刑歆慢鬼神犯刑政以成傾危之習哉殷作會而民叛周作誓而民疑世至春秋盟詛繁而約劑亂矣私盟之講蓋非一日然皆小國微者耳彼齊鄭

二國者東遷之始諸侯之雄也石門之事特相為盟而東諸侯不得不合矣曾未數年齊侯欲平宋衛之怨於是繼為瓦屋之役而參盟作矣有私盟而後有特盟有特盟而後有參盟參盟作而諸侯之合者不可離矣世道之變不至於幽不止也當是時也齊僖之在東州已有小伯之號而沉桓公出而仗義明信北杏于柯之後人心之不附者無幾矣逮乎幽之初盟楚患荐臻諸侯同懼鄭亦請成桓公聳然遂執牛耳為之盟主是雖

闕

內外之寮諱我公之往而人心之同欲者自若也自是以來極而至於首止葵丘之盛繼之晉文城濮踐土之事伯者之有功於天下於是不可一日無矣晉之世伯數傳之後陵夷至於昭公之世虜邾既成諸侯皆貳於是平丘之盟雖欲治兵徵會耀之以武而挽之使同然而晉之伯事終於不競而同盟之書亦自是而止矣由是晉人不能復合諸侯而鄆陵之會齊莒邾杞之君謀納我公公亦從為之歎矣吾不意二百餘年之後而參

盟之事復見於昭公之編也他日召陵侵楚無功而還
由是晉人復失諸侯而鹹之盟齊鄭二君自為之矣吾
又不意特相盟之事復書於定公之史也於是世變極
矣春秋亦不得而不作矣雖然始而求伯者齊僖有雄
長之心而鄭莊黨之也終而叛伯者齊景有代伯之志
而鄭獻附之也蓋有伯非天下之美事而無伯又中國
之不幸也昔者諸侯之未合也天下知有王耳伯者之
事果何有於我哉及乎諸侯之未散也天下知有伯耳

伯者之功誠中國之所倚賴也至於天下無伯中國諸侯莫適為主吳越入而爭長而齊卒不能代晉而興也故曰天下之無王齊鄭為之也天下之無伯齊鄭為之也豈不信夫



強齋集卷六

欽定四庫全書

集部
強齋集卷七

詳校官庶吉士臣龍廷槐

中書臣劉源溥覆勘

總校官降調編修臣倉聖脉

校對官檢討臣季學錦

謄錄監生臣方步蟾

欽定四庫全書

強齋集卷七

明 殷奎 撰

詩

初之咸陽別二弟

地遠知難別官閒識異恩
桑榆身未老松柏操終存
親養情彌切兒婚禮欲論
政須煩二弟成此好家門

留別鄉中諸故舊

天官謬選到非才相府陳情許放回豈意冷員叨忝去
却從新例調遷來親庭七十年方近客路三千里向開
遙想故人能念我題詩留別重裴徊

前赴京邑五妻弟送子蘇臺今往咸陽李氏又送
至楓橋臨別作惡情溢乎詞

異縣遙相送頻頻內弟來路從寒寺去身逐夜航開飲
泣難為語垂頭忍復迴自多甥舅好應得撫提孩

諸生送別閭門

衰柳閨門道丹楓遠浦橋淚容行路慘別恨幾時消
羈旅情雖惡師生義自饒成才吾所望相見亦非遙

九月廿三日江行回望鄉國不勝悲戀

敢廢君臣義難忘子母恩驅馳勞豈憚定省禮須存誰
附崇儒選才同謫宦論轉蓬江海迴洒淚望吳門

寄示駒駉

先生子
字牧夫

自期吾有後頗恨汝非才志學年方近成人責漸催童
心當棄去書種要留來準擬翁歸日情懷向爾開

寄孟學潛夫二助教

星散憐交契蓬飄愧宦遊斯文千載事吾黨幾人謀
稷下師傳盛河南學術優古風端可復流俗政須羞莫謂
無知已何須謾責頭平生期望在極目注吾婁

十月朔旦舟發高郵望拜先壟六言

遠去先人墳墓漫從薄宦江湖諸弟今朝拜掃傷心獨
望長途

夢尚之彥強來問病源所在隨以數語答之及覺

忘記其辭因成一詩徧寄崑山學諸生且因自警

云爾

二子從容問病源病源今日為渠論所難謝子除矜字
莫易溫公戒妄言廣大根基須與立徧私情好不教存
一朝大寐悠然醒始悟留心在勿緩

十月二日寶應舟中夜夢先君手賜一狐裘仰視
慈顏似憐其遠行者夢回傷感悲不自勝

故園歸夢夜初寒恍若平生語笑驩膝下狐裘親手賜

似憐風雪上長安

十月七日入夜北風大作連兩日夜方止

黑風怒捲長淮急白浪掀空如壁立天網欲解日月搖
地軸愁翻山岳泣大鱗失穴無處藏小龍跳淵不敢蟄
長艘巨筏縱復橫走碇摧檣危以岌此時坐我運甓船
胃倒腸翻幾絕粒岸水聞聲悸未平踏冰失足嗟何及
吾聞君子不乘危遺體葆藏逾什襲奎兮汝獨非人子
忍使身從魚濺濺屈指初終三日交痛定思之久嗚嗚

作詩為戒示兒曹十月九日山陽邑

過霸王城

淮山萬疊暮雲平
淮水千年咽恨聲
落日舟人重指點
前頭便是霸王城

夕次泗州

泗水寒流淺
吳船夜進徐
四方行役始
千里去家餘
晚飯憐紅稻
新錢買白魚
未知風景異
沙月野躊躇

僕與進成簿呂公別七八年矣今茲西行道出鍾

離進成適佐是邑相見城南澗阿為予驚喜買酒
相勞苦同榻澗西土室中夜興感惜子遠去故意
甚長口占一首以寫鄙懷

不見故人今十年異鄉相遇重堪憐山瓢夜滴梅花雪
土屋寒銷楮枲烟作惡中年為此別交情今日幾人全
多君高誼頻興感回首明朝定惘然

十月廿五日古城對雪有懷呂簿

東屯飛雪裏倦客自愁顏門為素生掩船從剡曲間到

關何日是行路此時艱癡坐茅簷底孤吟對獨山時呂在獨山

臨濠嚴守按行東屯有唱酬之什惜未之見漫成

一首兼簡呂簿

鍾離縣裏古城屯星散田廬帶郭繁雞狗相聞淮浦迥
牛羊歸牧楚山昏土風千里吳音在戶籍諸陵漢制存
太守行春僚屬從劬農詩句許誰論

黃仲真先生寄示對雪佳篇用僕前與呂簿詩韻
伏讀感愧仍次故韻奉呈

擬絮嘲鹽憶少年客邊對景轉堪憐飛花上苑春爭瑞
浮玉藍田暖失烟耕學老農占歲稔吟成禁體詫才賢
黃州喜報歸期近絳帳燈紅錦陣然

小山藜桂為梁伯益賦

梁竇遯世士偶然出中林暫作淮南客長有滄洲心朝
歌紫芝曲夜弄瑤芳琴移石對藜桂結廬寄幽尋振衣
襲古香倚杖息清陰春將麋鹿友秋與猿猱吟真游悟
至理雲臥散沖襟八公呼不起王孫無歸音皎皎空谷

駒縹縹丹穴禽題詩反招隱悵望碧山岑

題夏士文夢槐軒

槐根睡起已千齡又見茲軒一夢醒
深宮落葉秋滿地誰家喬木陰
當庭遠遊寥廓觀變幻昏醉乾坤養性靈
我欲與君為寤語請君暫向夢中聽

題呂進成屋舟

宦遊南北總浮家篷屋依然對白沙
不繫汎如遊物表無俛便若在天涯
誰人解蹋凌風舸何處重尋貫月槎

未必終朝橫野渡巨川一濟政非賒

僕客中主呂簿所因得遍交府縣諸公今日小至
辱德和使君招飲館舍而玄鳳丞公又有夜筵之
卜客邊懷感作此贈之

交遊歲晚遍江湖骨肉斯文信不誣一郡官曹同妙選
百年文運啟昌符山梅雪後衝寒發春酒沙頭滿眼沽
節物又驚逢小至離懷禁得上長途

早行

蓐食中夜起遂伴行卅里始發霸城亭既逾瓦井邸風
勁口益噤路暗步屢擬四野間無人孤鴻叫不止豈無
村與落空垣沒荆杞向前更兩舍當到宿州市假寐候
明發形役吾能已

隨堤行

君不見鎬池水枯魚欲鮑歲歲驅民築馳道又不見雷
塘塘上吳公臺引水直從西苑來西苑區區樂不足詔
巡淮海觀風俗千騎秦娥清夜遊院院承恩纔十六不如

崖削千仞隻輪通一線何物狡獪兒平地產怪變能令
晉楚爭解使劉項戰至今汜水波嗚咽猶含怨我來千
載下駐足一弔唁何當剝巖窵夷岨就平行銷兵鑄耕
鋤寸寸人得畋四海垣不虞姦雄爾奚擅

洛陽城外望龍門作

行至洛城下豁然見龍門連山亘千里闢當南崖根神
功發玄造面勢駕厚坤昔賢茲闡道光爛搏桑暎因之
景益勝後天鎮長存晴川一帳望畢志誓言窮源

澗池道中

殘臘行就盡短景仍自急蚤行澗池道雪霰方交集枯
腸冷欲冰野店久始及抱薪事晨炊糲米不暇漸遲晴
復登途敢自愛足力黑風西北來山石動葉發噴薄兩
崖間怒鬪萬夫敵沙塵委眼鼻口噤不得吸日車吹欲
墮正晝寒無色前歷千秋亭薄暮抵縣邑地主餽牛臠
館人秣馬疋炕暖筋骨融坐定神魄息緬思天壤內羣
動各有適胡為獨此來辛苦為形役先人遺體在保護

金...
卷七
敢失職終當返田廬母子相怡懌

閩外紀行四十韻

一下東吳船久留中立縣故人致慇懃行役成遷延忽
驚月破鵬沉喜雪見覲遊壯乏厚裝期愆畏多謹僂俛
渡長淮迤運違近甸雲來芒碣青樹帶隋堤茜睢水覓
忠魂梁園弔文彥飲馬石碣冰射兔沙田霰嵌巖陵交
峭蕞蕩渠餞汲虎牢鄭險失龍門禹功奠太行西北來
少室東南見幽尋互明滅竒觀爭繞旋綠河劇凌兢仰

關增畏煥竅一渾沌鑿塲百髑髏戰形勢啟與圖蹤跡
徵史傳翻思所跋涉撫已猶掉顛垢面色徽黎皸手膚
卷鬻足繭豔疊胼須冰白張片露食覘虛鍋風衣結斷
線膩衾烘虱蟻血弗貫獐豕夜戶伐棘遮寒羶抱蒿薦
浴坎慙僮程卧炕晒蠻僂涉患情靡驩懷安意徒戀親
知為留連伴侶相挽牽歷歷堦迎涂亭亭郵帶傳蹭蹬
苦院塞軒豁慊平行亟心或先歐澀步仍後殿噤口吹
棄灰困身踞停轉勞矜南士乍饑阻西值荐敢謂生不

辰所嗟命非戩嗚呼穹壤大局躋塵埃賤兒嬉忘歸榮
親省借夢便策竹當僕僮枕書儕屬眷胡為夫離公何
等文學掾不餒羣馬芻希餐孤鳳棟利器匪青萍良材
虛赤箭區區徒自珍落落竟誰唁題詩哦暗燈把筆呵
凍硯紀行已稠疊撫實聊貫穿傳觀代戲劇歸用詫聞
見

入關

秦關已入重行行道遠塵深兩恨并足倦每因佳境健

眼昏偏傍古碑明拾遺徒步歸何日莊舄孤吟嘆此生
何母故園頭雪白倚門朝暮若為情

望華山作

泰華三峯秀可知官橋駐馬已多時削成平地五千仞
壯觀西州第一奇雪壓天池龍卧穩雲深仙掌鶴歸遲
先天舊學無從問幾度躊躇劇望思

驪山懷古

繡嶺峒窵十九盤翠華當日駐層巒慣聽羯鼓花前鹿

金史紀事本末卷之七
卷之七
爭舞霓裳月裏鸞函谷東開無復夜雪山西顧不勝寒
可憐一派湯泉在國恥千年洗未乾

除夕

一身漂泊路三千長樂坡前逆旅邊寒榻愁眠殘雪夜
不知明日是新年

咸陽官舍述懷

兵後咸陽也可憐饑民延喘待豐年一城瓦礫黃塵裏
萬井蒿萊白日前就養路遙慙祿薄從遊地僻失英賢

情知自古儒官冷未似吾官冷最偏

春草

東風到咸陽吹起原上草偶然出門去迷却平陵道此
處斷人腸得似江南好

嘆息復嘆息打蒿充夕食春風自東來野草回生色東
風能生草不能生餓殍

述懷

役役感大化倏忽變冬春萬物各吐氣區萌亦求伸如

何獨睽隔置身埃與塵春秋曠宗職將母苦無因登
山目力短淚洒南飛雲宿昔夢顏色教戒語諄諄堂陰
樹設在歸省果何辰

孤鴻篇

孤鴻萬里身飛來到何處渭水沙寒野草枯不敢栖他
上林樹上林樹裏玉為巢太液波光刷羽毛翠鳥不知
生處樂一心貪戀此遊遨銜粉蹋花殊未已金丸珠網
忽相遭忽相遭無處避巢傾卵覆身首分死骨縱橫中

野棄寒沙枯草人不過孤鴻此處方婆婆不恨少稻梁所
喜無網羅孤鴻孤鴻奈爾何孤鴻孤鴻奈爾何

陪祀長陵作

黃蒿生野颺渭水正嗚咽下馬漢家陵落日照殘闕佳
氣忽已無隆準何代絕雄劍飛上天炎靈頓銷歇當年
一抔土經今幾開掘便房不復閉殮玉亦已竭踞獸徒
狎獐衛士空森列淚眼滴骨枯碧漬苔痕血烏乎千載
下誰者興悲恒聖澤渥泉壤崇祀追前列曠古信有光壯

金
卷之
業遙相埒回睇楚天雲飛揚向空濶

咸陽原次王景徽憲僉韻

秦山不改色渭水日夜東昔人矜迭王陳迹併成空五
陵幾樹碧一炬三月紅觀風弭玉節孤詠睇南鴻

茂陵

欲修封禪覓蓬萊武節巡邊萬里回祠竈有方能却老
茂陵還近習仙臺

馬嵬坡

馬嵬坡上草青青
血染妖魂喚不醒
嗔殺當年丞相宅
美人不到水晶屏

重賦一絕

嬖女伏誅臨內闈
賊臣留討付東宮
馬嵬已定中興業
靈武誰誇第一功

殤真長

苔英陵紫霄榮悴
倏相襲杏乳剪霜刀
落地不可拾娟娟
娟芳嬰面秀色頰
玉立生之既不易
殤之何太急神理

誰能詰物命孰使執搔首問青天高聽不及

寒食

咸陽官舍冷無烟翹首南雲思黯然淚眼遙憐諸弟在
吳岡門北錢塘邊

清明日喜雨

關陝連年苦旱灾春田如石墾難開十雨直教一雨足
二月欲盡三月來菜甲充腸回餓孽麥苗滿眼發枯荑
先生共喜夜不寐飽飯終年不用猜

清明有懷公武

忽見清明在客邊，
可堪形影自相憐。
憶尋芳草江南好，
謾惜餘花亂後妍。
孤夢月明歸夜夜，
多情春老恨年年。
夕陽玉子岡頭路，
知與誰人共醉眠。

漫成

無榮無辱任踈頑，
未有平生此日閒。
月幌聽烏當北斗，
風簷捫虱對南山。
人情落落休分別，
身世悠悠謾往還。
問有未償何債在，
青鞋終華待躋攀。

送季公存主簿還褒城

巴茶充貢入長安王事能忘道路難
閣道馬鳴關月冷
站車馳困嶺雲寒
償來官課囊應澀
打去碑文墨未乾
明日擬將顏帖寄
好分鹿脯到朝盤

王憲僉餽餅餌

繡斧分巡禮數寬
憐才特地輟朝餐
官厨餅餤紅綾樣
分入先生苜蓿盤

懷公武

快字豪吟在赫蹏一庭春草夢魂迷草堂憶得逢裝夜
罷酒篝燈候曉雞

海燕

海燕朝始來巢我舊堂楣酸棗作春花還是去年枝微
物亦有常人事乃不齊東風故園暮萬里愆歸期豈無
弟與妹志養須躬為親憂路共長況復音書遲安得如
海燕飛去慰所思

憶江南三首

江南憶何處憶當先憶吾家春水船有酒有花重慶
日無風無雨太平年朝夕侍賓筵

春水船乃先生家樓居
名在婁東武陵橋下

江南憶其次憶何人正憶高堂七十親膝下舞筵圍稚
子花前茶會洽比鄰長奉笑顏春

江南憶何事次當三弟妹妻孥共笑談舉酒涼秋持紫
蟹張燈春夜擘黃柑寧不憶江南

故園醑醑

一架醑醑手自栽故園春老未曾開明年乞得身歸去

滿為花神酌一杯

紫荆樹

紫荆親種北堂前
春雨宜男色共鮮
擬舉韋家為月會
乞身歸去莫遲延

飲酒

薄薄市沽酒陶然得天真
長安二三月亦復可憐春
山鳥勸提壺山花能笑人
朝來黑頭公暮歸黃土墳
漢家舊陵闕無樹照斜曛
雨荒西內殿草没上東門
今日不

強飲古人誰復存

早起

今日起來早開戶見南山日出鳥相鳴雲斷龍飛還欲
往翠微處復畏暑路艱梳頭坐門畿聊且樂吾閒

故園

野雉將雛乳燕飛風光人意兩相違宜男草生春已老
牽牛花開人未歸

贈同官茅丞

海門東畔是三沙絕域孤城去路賒紫蟹銀魚充頓頓
紅椒金橘種家家地鄰員嶠仙人宅門繫河源使者槎
枳棘元非栖鳳處故應歸思滿烟霞

寄麟游危丞

危公佐山縣頗躡傲吏蹤白眼對時俗岸幘詠孤松淮
南無隱士壟上有耕農公事吾已了偃卧元非慵

咸陽逢卜師顏照磨

故人已別十年過衰鬢相逢半已皤共挽客衣憐道路

又持使節傍關河歸來西掖清光近坐對南山爽氣多
庭下鳥啼人吏散紫薇花發柰君何

次韻武功余主簿見贈

作簿如君信可書妙年直節見廉隅邑人自此知從化
天下于今正用儒遠荷到門題作鳳空慙授館食無魚
萬里庭幃虛侍養幾時同此賦歸歟

憶學堂前凌霄花

開遍凌霄石上花先生猶自未歸家去年此日花開裏

幾度憑闌到日斜

送人從軍

小隊擁霓旌從軍右北平
輕身常逐北猛力慣擒生
落日黃河動清秋太白橫
單于未款塞勛業待君成

平涼電

仲夏之日十又九平涼城下
晡時後陰風吹雲變天色
寒氣襲人噤人口須臾膈膈
聲滿地怪電橫飛大如斗
摧車折木不可當人馬辟易
逃林藪東門宿麥熟未漸

美實離離遍田畝就根平削三十里一穗不存君信否
道傍老父向人言此田官種非民有欲知種者是何人
兩府指揮都督某烏乎天道豈夢夢警戒昭然事非偶
厚藏多取物斯忌害盈福謙神所守君不見公儀休曾
相東魯拔却園葵去織婦又不見霍將軍在漢武時匈
奴未滅家何為

寒蟬

已分長依露葉秋嬾陪貂尾上人頭風前不敢高嘶去

怕被虛聲惹別愁

野鶴

野鶴長鳴老樹根呼來不上大夫軒
羣雞啄食誰爭去
風滿秋林獨自鶩

陪吳令訪古長陵留宿蕭城僧舍

青鞋訪古長城坂路僻草深人跡稀
落日漢陵雙闕在
閒雲蕭寺一僧歸
覽觀幻境時時別
點檢浮生念念非
我亦此身無住著
晚來禪榻暫相依

夜雨

一床夜雨梵王宮預送秋聲到客中
孤夢曉來休喚醒
要從渭北過江東

宿渭城田舍

陶然一室野人莊榻席當門石枕涼
飲食更憐淳樸俗
禮從宜處便隨鄉

初度

年年重六日是我始生朝自昔增悲感于今更寂寥盤

餐慙草具奠醑恨蓬飄望裏南雲白魂飛未易招

見月

舉頭見月使人憐自出門來十上弦阿姥此時堂下拜
教兒無事歸來快

張將軍廟

咸陽縣中春寂寂官寺民居皆瓦礫歸然一殿渭河邊
暮雨荒垣翳蓬荻人言此廟祀張侯作創年深失來歷
但見舟人漁子事之謹常具盤餐致私覲七月二日慶

生朝十隊水嬉飛畫鷁露臺百戲競娛神變幻魚龍走
巫覡口稱將軍主吾渡渡口流傳多偉績盲風怪雨白
浪翻過客乞靈無沒溺況聞生時在當陽據水橫矛氣
如霓曹家水步八十萬瞑目一呼無敢擊生前英烈死
為神廟祀夤緣豈其的吾儕小人無識知知有陰靈係
休戚只今香火甚蕭條風雨前時破堂壁貌像摧頽府
藏空旌旄散落門庭閒何當一日還舊觀好妥神棲薦
清滌小人託命在風波衣食生來此中喫縣官倘有修

葺意願効區區答涓滴我聽此語為躊躇祀典民情兩
相閱將軍自是熊虎將猛力雄姿萬人敵長刀不斫嚴
顏頭國士之風何儻倣功存漢鼎三國分義却秦兵千
載激荒城野殿何足多不慰吾民久驚惕我來伏謁豈
有他前史遺忠自相覓作詩薦憤代牢羞投卷中流同
弔汨

不寐

中夜不成寐起來看明月候蟲吟一聲愁腸幾回折愁

腸折還續宛轉如環玦出戶野躊躇商飈倏已發商飈
來何許吹我頭上髮莫吹淚入河添之作嗚咽

弔陳壽夫

去年此日崑山縣射圃亭中開小宴壽夫送我上南京
把酒題詩苦相勸酒酌碧筒對花飲詩題素壁成吾識
誰知歲月才一周兩人生死不相侔我行萬里生如寄
君得一官死如戲人生變故不可常灑我風前幾行淚
北固山在何處西風落日大江秋詩酒明朝弔君去

南山三絕句

南山突兀塞吾齋
啗飯看山似食鮭
山自有心來近我
何人裹鞵又穿鞋

南山萬疊為吾開
一日支頤看幾回
最是夕陽時好看
幾人閒處解看來

看罷南山看北山
北山奇峭奪天慳
有時走上高原去
秀色娛人忘却還

與吳宗德縣令訪古西原

無僧秋寺倚荒原劫後三控幾許存爭取唐碑鐫字記

一碑未刻卧山門

鼎師控

異人乃有重陽子四海全無第一師今日偶來尋故宅

海棠開過已多時

天聖宮

野寺猶遺一老僧客來閒話失歌蒸出門不覺歸途晚

一片斜陽挂茂陵

吉祥寺

題吉祥寺壁畫僧

何人盤礴羸寫此特健藥三問病維摩閉眼不一諾

夜涼

玉露涼生昨夜秋芙蓉香老柳枝愁故園歸思知多少
卧聽殘更轉戍樓

吳明府惠嘉瓜

光含碧碗蔗漿寒色浸紅犀瑪瑙盤故侯親手門前種
摘送相如渴夜餐

送武功余簿行稼商州

秦嶺縱橫宿雨收西風匹馬踰商州錦囊詩句題應滿

此是南山第一遊

次韻曹長通見寄二首

故山隔我幾重關，翹首愁懷遣正難。
春日題詩來未伏，蘇州明月過長安。
交游滿眼無如舊，盟好經年頓覺寒。
每憶吾鄉諸壽俊，至今文力尚桓桓。

故人別來隔冬春，勞我夢魂飛海濱。
秋山終欲援藪桂，夜雨滿擬餐絲莼。
平生寂寂從人笑，末俗悠悠祇自珍。
緘詩萬里寄孤客，直比骨肉情相親。

得家書借長通韻懷二弟

封書遠寄自鄉關
令弟恩情政急難
萬里元非雙節貴
千金獨有一身安
月明孤館啼烏夜
秋在疎桐滴露寒
歌枕愁腸知幾轉
歸期那敢尚盤桓

曲堂花樹可憐春
白日愁眠寂寞濱
老去慈親慙負米
秋來諸弟憶美純
獨遊縱美誰為貴
同處雖貧自足珍
聞健歸來一尊酒
百年相守意彌親

疎雨

庭曠疎雨響夜涼歸思多緘書未能寄流恨滿烟蘿

秋樹

秋樹已撼撼秋風復吹吹獨居感時節憂來浩無涯念
身匪金石強壯忽已移四十懼無聞五十庶知非丈夫
事業在用舍無盈虧自信苟不謬天命吾奚疑

貢院夜集

秋暑不可那風庭生夕涼高樹互蔭蔽雲月流微光龐
眉三數公幽賞來相將才彥集翹楚亦有張與黃咄茲

古都會況當文翰場前徽信未沫風慕斯終償於馬盤
礪羸欣然命壺觴趣得景自會心迴形都忘談諧雜嘲
謔引此清興長良晤難屢得樂事不可常酒行莫辭醉
散去徒相望

鄭叅政第宴集

秩秩賓筵晝日開校文初罷棘闈來省臣禮數寬容抗
座主文章老許陪碧椀漿寒清骨氣紅綾餅奕膠牙腮
醉歸鼓腹羞餐素預擬橫堂育俊才

張昭季索送傅君還彰德詩

歸來老人雪滿頭廿年汗漫西秦遊終南太白意不足
直上慈嶺窮冥搜手探河源躡積石崑崙磅礴皆歷歷
九點齊州两眼空却返三峯聊一息人間之世何紛紜
遍地干戈不可聞只今天地重開闢霽日揚光萬景新
天王降詔厚風俗養老今年飲鄉曲翻身歸賞故園春
亭此太平無限福相州却築歸來莊笑殺韓家畫錦堂
一生富貴今何在萬古功名畢竟亡君不見東門黃犬

華亭鶴死不得歸空作惡

送吳明府南還

茂宰貴從樞府出荒城喜見德星臨
飢寒忍放鞭笞手流轉頻勞撫字心
伏櫪難羈千里足甘棠纔駐一年陰
渭川過雨秋波滿得似離愁幾許深

以地圖贈吳明府題詩其上

路從秦嶺入吳關萬里山河百戰殘
攜取地圖車子上一番登覽一開看

與吳令遊鴈塔

合尖百丈插秋旻
俛仰千年感慨頻
梵夾已成空相久
題名都化劫灰新
雲來重灑思親淚
雨歇纔清拂面塵
來往忽忽聊記此
他時留與話前因

寒蟬

白露凝霜抱葉眠
渴腸愁殺夜來蟬
羣兒莫謾相輕賤
清節高風死亦妍

述懷呈昭季教授

長安學舍十日雨客思秋來何可禁出門青泥沒兩屐
滿城素練敲千砧田園荒蕪歸未得桑梓夢寐來相尋
賴有主人張季子每聆清話入更深

次韻吳明府

赴闕是還鄉無煩恨路長蠨蛸空罾戶擺極已登場轉
覺行期近頗添別淚滂雲泥從此隔聊復駐蓬裝

興慶宮懷古

落日宮城詠黍離一堤衰柳護龍池蓬萊已失清時水

華萼空餘劫後碑
錦瑟鶻鶻聲聽去
杳玉笙鶴背候來遲
祇今遺構還修葺
應識雕牆鑿戒垂

九日述懷寫寄余秦袁陸諸鄉先達

辭家來此恰周星
汎汎浮生水上萍
萬里乾坤渾欲老
五更風雨不堪聽
黃花天畔憐彭澤
青橘霜前憶洞庭
歸計坐來成蹭蹬
飛鴻回首羨冥冥

宋晉寧節度使徐公與金人戰死葭州七世孫備
為耀州判官以公事至葭見公題名石刻尚存乃

致祭而還

葭州徐節度死節壯南朝大義親能滅忠魂孰與招山
川猶慘淡歲月已蕭條萬里諸孫至遺民涕淚饒

奎在鄉里時辱先達諸公折輩行與之交者多矣
而或遠在百里之外近亦不下一二舍以故不獲亟
從之游獨吾叔御道原公武次泉潛夫數君子居
相近志相同出入往來無間蚤暮有得必告有疑
必質當是時亦誠以為樂矣而未知其為難得也

一二年來或出或處或南入于廣或東往于齊而
奎亦遠迹闕輔閒居獨處每一興懷平昔從遊之
樂如在天外茫乎不可復得然後知會合之不易
而離索之為苦也昔之人中年為別必數日作惡
豈為過哉作詩一首以寄此懷

離懷莫怪涕如河柰此平生交友何翠閣半山春共賞
板橋深巷晚相過篇詩出口賡酬快盃酒論心勸戒多
今日天涯分散盡幾回中夜獨悲歌